

四庫全書

集部

欽定四庫全書

雪坡集卷四十七

宋 姚勉 撰

祝文

西澗書院祭魁星

維斗有星第一曰魁上拱紫微旁列三台司文之權光
芒昭回鬼斗入夢先兆有開偉茲澗堂鳳山崔嵬江湖
川閩雲蒸英才有詔興賢士爭踏槐邀靈于星文刃恢

恢秋風聯韉鈴聲喧飀春榜蜚英禹門之雷昨庭唱臚
百花之梅萬里榮途瑞慶大來徼福投誠尚相之哉

正誼書院祭魁星

魁第一也北斗七元在天為衆星首而魁者乃斗之第
一星也魁之枕參則曰參首杓之攜龍則曰龍角東蒼
龍角亦二十八宿之第一星也杓之所攜猶第一宿而
况魁乎魁傑立名取象在此前輩有言曰科第當作狀
元仕宦當作宰相學術當至聖人言皆當為第一也士

之遠大自期立志要當若是此吾正誼師友平日之所
講明也歲壬子詔賓興壬為天一子首十干明年癸丑
丑為斗牛分魁兆開矣維七月朔乃三秋之第一日用
率衆俊歲禮大魁神之相之貢于鄉若漕第于太常策
於大廷使臣正誼之人皆第一自此卓然為第一流人
物于斯世維魁星實照臨之

賜第後謁先聖

子路問事君子曰勿欺也而犯之臣等日奉對于大廷

弗敢背先聖訓盡勿欺之義抗犯顏之忠昭事君之初也聖天子容受直言誤膺親擢臣等非敢以是干祿也臣事君以忠願終始之

究國公

克己復禮公之學也四代禮樂公之事業也夫四代禮樂蓋克己復禮之推耳全體大用詔後之人某等其曷敢弗力

鄒國公

先師有言曰古之人修其天爵而人爵從之今之人修其天爵以要人爵既得人爵而棄其天爵古之人乃所願學也今之人敢告不能

西澗謁劉屯田

曰先生之志利祿秋毫先生之風廬山俱高嗟我後人仰止先覺富貴何榮願保天爵

謁劉祕書

曰世嘗以為高安未有魁天下者先生年十八以春秋

對為第一非魁天下乎雖然此易能也溫公則從安石則忤非不可奪之節乎力疏其蔽自攻厥非非克己之學乎是難能也學其所難能而不止於其所易能此後學之事

謁劉檢討

曰方賊京之勢炎滄趨者其瀾倒吾知有天子不知有權臣凜乎斯言千古可作高山景行實獲我心

謁陳宗丞

曰奉天子命為州者言政而已安及他公創始書堂講貫理學此盛心也雖然衍文公道脉於此邦公之倡也續文公道脉於此邦公之望也願與同志共學之

乙卯秋祭魁星

某等謹以連薦早登高甲之儀致祭于北斗第一魁星之神曰昔在癸丑魁躔炳靈俾某駑鈍誤恩天庭此魁非難三歲而有魁而難者衣鉢授受猗歟聖代何僅二堯實以兄弟首臚天朝若顯若固去華師德父子科名

世此魁脉卓卓橫浦嗣以應辰有斐師友皆第一人前
美固專顧繼芳躅尚期顯相斯文之福

祈雨迎利貺

秋且成矣常暘暎之不惠厥終民且艱食邦侯迎禱亦
既感通民之望霓尤冀沾足惟王廟食茲土民恃以
天胡寧忍予俾至斯極用是肅奉珍駕往即道宮率籲
合欽以請甘雨神旗肇舉霽霽隨車三日為霖豐我穡
事惟世祀之永永無斁

迎龍王

大禮大川能興雲致雨則祀之瑞有神龍于潭攸宅蓋
一方之司命歲且秋矣不雨害成焦焉弗寧艱奏是懼
比邦侯延致神御祠于郡庭亦既禱而雨矣茲百姓重
迎之道宮以祈神其矜而從所欲乎起蜿蜒于重淵布
雲霧于曾宇沛澤三日普施四郊惟龍君是望永享祀
于茲土

嶽祀祈晴

此以下並代作

膚寸之雲不崇朝而徧雨於天下者嶽也今既沾既足
矣霖霖滋久適害嘉禾洪水屢滔尤使小民艱于厥食
吏不能又以致暘若百姓奚咎齋心潔已祇謁于祠神
之相之易常雨為時暘以茂毓斯稼且使鰥寡罔或告
病神之貺也吏之望也

利貺廟祈晴

夏暑雨小民惟曰怨咨既霖而霖將害于稼不能又民
以臻暘若繫吏之罪惟神廟食此邦必軫念于百姓有

衆斂此常雨易為時暘自今以始歲其有神其尚克相之

祠山靈順二廟祈晴

天作淫雨害于粢盛維吏之愆民則何罪潔蠲祇肅虔
謁于神其排豐隆掃雲師收斂陰霆顯行清暘庶幾黍
稷實發實秀以遂茲有歲吏不敢忘神之德

祈雨

曰雨曰暘皆欲時若仲夏五月霖雨連作虔謁于神憂

稼之傷神之聽之雨回而暘今茲蕪甸多暘少雨早稼
雖登晚稻之苦載敬載肅復告于神神聽昭如終惠我
民駕風驅霆旁暢甘澤既優既渥豐我黍稷曰雨而雨
民不旱憂奚吏之功惟神之庥

迎城隍祈雨

神廟食茲土福庇我民應禱如響乃夏之月迄於今不
雨苗欲槁死民將無年吏無善狀以干天和民亦奚罪
敢奉神御往即佛宮齋精潔誠為多稼請命神其鞭豐

隆驅雲師滂施甘霖以成我嘉穀吏不獨拜神之賜千里之民飽神之庥

迎仰山祈雨

神有掌于天實職風雨稼且穡矣常暘暵之民將無以食吏為此懼奉神主于佛宮為民請甘雨之賜轉槁而蘇回歉而豐神反掌間耳密雲隨車凍雨洗道肅御之初敢以此告

迎龍王祈雨

噓雲吐雨厥惟神龍王實司之歟可使豐不雨月餘苗
且槁死王食是邦忍使及此敢奉神御于梵之庭靈旗
歟來駕風鞭霆載霧甘霖活我嘉穀感神之庥曷日而
足

謝雨

比以亢陽日驕心與苗槁並走羣望輯而祈之神惠顧
歆甘雨隨格吏何以得此神之福我民也雖然願神其
終福之今也膏雖施而未周槁僅蘇而未澤神不福我

民無前日之雨矣神之福我民繼自今猶大有望於神也三日以往為霖願神其終福之豐年報功有祀典在

戊午春祈雨

春事方興旱乾已甚未見播種豈有收成念蠢蠢之為氓將嗷嗷而乏食謹隨里衆虔告穹旻雖略遂於沾濡尚未臻於滂沛似聞旱勢遠自上京蓋千里以皆然不一邦之獨爾臣憂惶愈甚寢食不遑深虞羣小之蔽君是致上天之降怒自涉茲歲益異前時日月為之無光霾

霧從而肆翳雷音不震得非號令之或非雨膏愆期無
乃恩光之失施實闕宗社之計畫傷歎歛之心惟祖宗
三百年積累之仁而海宇億兆姓生靈之衆咎在臣下
罪非小民矧敵國之方強賴本根之自固儻成旱勢禍
起蕭牆臣興言及茲過慮彌切上而憂國下則哀民惟
仰籲於聖聰庶可回於否運是用勤拳百拜懇切辦香
願憫愚忱大施甘澤油然雲沛然雨盡救暵枯鼓以雷
潤以風遂通泉脉

代謁先聖

仕而優則學學而優則仕聖門高弟語也某學未克優
苟祿而仕視魯語愧矣亦庶幾於仕優而學乎昔者子
游聞諸夫子曰君子學道則愛人某雖不敏請事斯語
代謁諸廟

某公族一寒來此佐幕惟神廟食茲土祇事之始用敢
告虔聰明正直而為神公勤廉介而為吏職業攸宜吏
不敢不勉呵禁不祥俾獲安處則惟有神福之

代告本衙土地

某稍食于此邦爾神血食於茲宇神之職于幽猶吏之職於明也民之安靜惟吏職之吏之安靜惟神臨之詩曰靖共爾位好是正直神之聽之介爾景福

文昌醮宿建詞語

大比興賢又值設科之歲前期卜日用嚴事帝之忱恭按金科肅陳寶醮薰潛通於肸鬯展均被於祥釐伏願天鑒積誠神欽宿戒朱衣豫送早標仙籍之姓名紫詔

鼎來同奪亨衢之步武

早朝詞語

夙寤求賢式際明揚之旦
昕朝奉對期沾顯擢之恩
嚴肆覲於玉宸冀仰通於璇極
伏願清光俯照穹鑒昭垂
貫日懷忠早被臨軒之冊
告辰定命獲趨待漏之班

午朝詞語

日麗中天極容光而必照
帝臨下土冀微感之潛通
當午影之融明望端門而載覲
臣等粉榆同社葵藿傾心

駒隙易流不敢荒於暇日桑蔭未徙願早立於大功伏
願恩被春朝光承晝接傳臚麗正獨班穿龍影之旗講
事延英十刻轉雞人之漏

晚朝詞語

月魄載西僊籍已香於丹桂斗杓揭北魁躔先動於寒
芒肆舉朝儀聿嚴夕禮惟天陰隲有欲必從凡而幼學
以壯行期於朝奏而暮召伏願書燈課效進登霄漢之
梯御燭分光趨上星辰之履

正醮詞語

天為國以生賢欲扶世運士讀書而求仕思應時需故
當選舉之辰願在搜羅之列臣等誤蒙帝渥謬玷仕階
然猶均願於在人不敢私求於榮已歸誠穹宇祈福鄉
閭初非為微臣希進之謀第欲遂多士亨通之志庶幾
盛事疊見此邦出人品非常之才為明時有用之器恭
望聖從凡欲神格衆誠副英君忠孝之求儻偕穹擢任
天下國家之責願竭精忱

又文昌醮詞

伏以脩其天爵固可知人爵之從簡在帝心庶克動君
心之眷故求之顯者不若求之隱而得乎幽者斯能得
乎明用嚴昭事之儀式合精祈之敬臣等迂踈寡識庸
謬非材誤荷穹恩已濫躋於仕版尚期盛事復層見於
鄉閭念茲里閭之儒久事黉鈞之學幸逢大比願擢高
科非徒為富貴之謀實欲效君親之報仰祈睿鑒俯燭
愚誠賜之名第以發身俾以忠忱而事主伏願三魁傑

出重增九貢之名四相並登益顯一邦之盛

壽帝君疏右語

電繞神樞光啓發祥之兆天頒科詔偶鄰毓聖之辰壽
胥慶於無疆福尚祈於廣布伏願極天比峻與物為春
凡合敬以同誠各儲恩而垂祉催班楓禁青囊早領於
進書較藝蘭宮黃甲預占於賜第裕垂嗣續榮被鄉閭

上元縣醮詞語

萬家為邑謬承宣化之流一念在民庸瀝祈安之懇恭

陳寶醮虔禱璇霄伏望帝鑒昭臨天庥滋至上元校善
蚩氓既遂於全生下考成書拙政尚期於免戾

代沂邸生日設醮詞語

伏以人情欲壽矧懷愛子之心太上好生庸瀝祈天之
悃揆予初度冀此永年重念臣妾男某仰蔭層穹承恩
懿邸惟藩惟屏願如漢家磐石之宗俾艾俾昌期受魯侯如
岡之祉恭延羽客祇設瓊筵伏願帝垂以慈神介之福
萱花不老仙家日月之春長蘭葉有光石室山河之誓

遠

沂靖惠王諱日設黃籙詞語

前王不忘茲際超升之日永世克孝聿懷追遠之思吉
蠲為饗齋戒事帝恭望鳳旂降格龍駕來游對越在天
儼神靈其未遠克昌厥後綏壽祉於無疆



雪坡集卷四十七

欽定四庫全書

集部

雪坡集卷

四十八至
五十

詳校官庶吉士

臣初喬齡

主事

臣呂雲棟覆勘

總校官原任中允

臣王燕緒

校對官中書

臣戴衢亨

謄錄監生

臣王翰

欽定四庫全書

雪坡集卷四十八

宋 姚勉 撰

祭文

祭師范石莊先生

嗚呼先生之學出史入經先生之文孔思周情振筆吐
辭藻絢華發春花意生秋水瀾活不鄙謂勉可學古人
毋陋之習刊陳叩新孟子丘明次則韓氏匪此三者請

姑舍是文史之暇教之經綸如是尊主如是庇民評古
商今竟朝窮夕間語他人終莫詣極才大用罕名位弗
羈放意盃酒窮達不知勉叨誤恩誨出夫子陸奏蘇書
言猶在耳受恩罔極報施未能天胡奪之遽夢兩楹如
勉來歸旋茹荼毒方父之葬又師之哭茲奉冠劍藏于
新塘恨以寢苦不能室場明日遂行卮酒為別先生何
之有淚皆血

祭友人幸科院

嗚呼季哲之才英拔豪奇松垣為父弘齋為師學與識
以俱高文若武而兼資議論豪宕而不羣器局卓犖而
不羈騁筆成文吐辭為詩波濤橫湧風霆並馳昔者叩
閤累疏便宜指病陳藥皆可濟危使當言路決不飫仗
馬之粟抱寒蟬之枝有志事功歷游邊陲審勢識便氣
吞強鄰使得兵柄決能快長纓之係奮折箠之笞諸公
見賞薦剡上飛僅金閨之通籍分大農之攸司嘖煩言
之遽興羌以是而為非身在山林宣室見思意公道之

可明帝將與之節麾何一往而不反竟客死於京師公
之東去適我西歸欲勸公以勿往騏驥逸而難追曾日
月之幾何成古今之長離冢嗣方鰥而未孫王孟克家
而早嫠次郎短折而未窻孤女擇歸而猶遲天胡奪之
甚速乃浩然而長辭齋壯志而永終不盡用於明時國
失此才家失所依興言及此感涕漣漣聞別音之琅琅
不浩氣之少衰愚鈍如我亦託以遺於此時而猶記安
敢負於心期哀斯人之不可見嗟曷日而忘之雖然公

之平日見如著龜死生一致昭晰無疑其歿也瞑三日而復活其活也喙一笑而遣醫若一肘之屈伸以去來而為嬉然則如公者蓋所謂烈丈夫之事予也何敢又徒為兒女子之悲

祭表兄吳景蘇

嗚呼吾嘗聞諸吾母曰兄之生也外祖書林先生實甚愛之曰是他日可以昌吾門矣及兄之長博通六經諸子百家摘抉冥文撼場屋煜然有聲人皆謂書林先

生之有孫矣夫何屢試不偶壯志彫零放意麴蘖玩心
黃庭視人間世之功名富貴榮華聲利若皆不足以掛
意而惟馳神於飛霞八境之太清然猶冀兄之存也尚
可以繫吾外祖之書脉而豈謂兄之年僅及於天地之
數乃遽委骨而蛻形嗚呼自兄母而言則兄吾姚之甥
也自吾母而言則兄吾之表昆也自兄之婦而言則又
吾之從女兄也豈惟瓜葛疊戚重姻於兄之歿悲感倍
增孀妻煢煢義聚之家固可以畢其老兄無子而有五

女高低駢立誰依誰聘嗚呼兄之生時有不適意而委之度外者死而有知其亦漠然無情耶是重可悲也所幸兄家以義為門孝慈如一今雖無子而從兄弟舉其葬則他日羣從中之多子者尚可謀以為兄之後女之長也又當共擇所歸使無失其托以慰兄之靈獨惟外祖諸孫今失其長孟舅二子今僅存幼名也學通六經而身不一登於貢利也家徒四壁而粟不一儲於瓶雖然名利亦不過儻來之外物所可道者既歿而猶為人

所惜公論在於日月之鄉評生雖窮困於布衣而未嘗
妄取於非義生雖放曠於盃酒而未嘗踰越於準繩是
非甚明而未嘗談人之長短學問甚高而未嘗縱已之
驕矜謹訥重厚退如不能凡今之人一藝可稱身儼吻
薄足高志盈孰如兄者尚有典刑嗚呼哀哉嗚呼哀哉

祭族子霆伯

嗟某與子雖為族人於族之中又密且親子幼學年子
已俊發來遊場屋詞藻清拔先君謂我此文叔兒起慕

起畏奮然思齊後此六年在辛卯歲予叨薦名折翼而墜子來慰我射目中眉惠我以啓教我以詩斯文締交實自茲始宗盟見推俾執牛耳以至今日凡三十年分則籍咸情則運連子天資高博學強記顯經隱傳爛漫肝肺揮筆洒紙驅風駕雲笑罵詼譌動皆成文寫興為詩風雅膏馥引行縱草龍蛇起陸以若人物眼中蓋希人滿謂子桂林一枝命不副才事乃大謬釋志利名肆意詩酒伯倫太白今古此懷蘇二黃九夢魂往來金玉

害塵軒冕坏土白眼富兒閉口阿堵視物甚眇自處甚
高酒酣八極挺然人豪予方窮時高臥抱膝頽簷敗壁
相與終日予昔喪母宅兆未安吾母汝母子山吾山先
體之藏子廬之側雲溪風月天境泉石誓言他日皆隱
於斯牛羈同騎魚篠對持如何蒼天奪子之速芙蓉冥
冥脫屣塵俗去年正月詔召覲京子遣幼子隨余東征
今年此時子則已沒素車白馬來執子紼敵犯鄉國幸
爾無虞如何一疾竟隕其軀夏秋之交亦聞告病汝子

亟歸書止弗聽予忤權倖九月遂歸永溪早涸反棹以
遲十月中間方此善達乃隔決旬死生契濶病不饋藥
歿不撫尸遺恨千古予罪奚辭子之此心不間生死我
爾之身無念婦子昔昌黎伯祭姪老成辭誼婉惻皆予
之情有食終喪否則遂取予豈敢忘昌黎此語吾子欲
教汝子亦然予豈敢失昌黎此言死生由天道義由我
子知予心必信其可秦源先壟明日遂藏幽明永隔來
盡此觴

祭外甥吳英孫

曰東坡之甥曰柳山谷之甥曰洪吾無坡谷之賢見汝之幼而穎則冀其如坡之柳谷之洪也嗚呼吾今失望矣豈料爾止於此乎岐嶷之狀如在目前姁好之容尚存夢裏哀哉猶能歆舅與外兄之祭否

代祭高叅政

二儀間氣萃乎峨岷篤生我公為時偉人伯璫仲篴韓韓棠棣追翽逐翔名蓋一世昔在嘉定公守于鄉遇寇

阻江力扶蜀方帝嘉駿功奮蹟朝路執簡司綸金玉王
度外贊戎略內隆主知式造其歸晉登樞機真德實功
衣被天下危言覈論福在宗社國步方棘是堪倚毗哲
人其萎天不憖遺嗚呼坤軸西折壁玷甌缺今無我公
誰拾潰裂天凍地濛哨騎數驚今無我公邊塵孰清正
人晨星諸老霜木今無我公善類疇福默默仗馬局局
轅駒今無我公昌言孰謨邦失柱石士無宗師人亡國
瘁聞者涕悲惟先君子志合道符俾我小子綴于葭莩

在癸卯秋拜公西府姑蘇一舸亦侍步武遇我獨厚杖屨日從色笑誨言溫然春風別公來歸荐歷憂患陟岵既悲絃瑟仍斷相去遼濶心親迹踈維是棘人不遑寧居曾幾何時公遽捐館拜公不復泣繼而歎教誨在耳威儀目前回思曩時一夢六年悼亡之初辱賜勤慰復賜為銘幽壤榮賁惟公於僕恩意至隆宜公之夢酸痛攪衷維婦寔期不遠伊邇往哭不能悵隔千里遣使設奠矢心以辭哀哀魂夢尚克鑒之

祭胡上舍宏甫文

嗚呼宏甫博學多文意氣軒豁邁德絕羣發為文章該
貫義理馳騁古今意盡斯止其在場屋泠然有聲訾彼
萬夫羣瘖獨鳴跬視青雲囊探丹桂命不副才動得困
躓憤不直已寄徑鷗冠人謂由此亦可美官君曰噫嘻
非我所樂豈其鞍馬借此薦鶚重湖之北大江之西出
其緒餘輒魁南闈上之春官一第直摘到天折翅幾點
龍額顯顯季父立于周行爰自胄監蜚英天庠謂當此

時凌厲奮發如何荆璞屢獻屢則言事竄斥學校積輕
君曰歸歟家在赤城種竹蒔花池藕畦藥吾沙有鷗吾
嶼有鶴亦既閒暇詩書自娛胡不少留御風憑虛昔癸
卯秋客君之館國士相期意味渠歟一散不聚十有五
年雖有尺書不如晤言天邑來歸甚欲君訪出憂入患
如繫我鞅今年八月唁我一書豈謂此筆乃成別予聞
訃失驚飲泣奔弔但拊其棺無復談笑哀哉宏甫乃止
於斯壯氣抑鬱亘為天霓舉世紛紛無能富貴君乃虛

生使我長喟聞絕之際語音琅琅付托乃予豈敢或忘
予於交情不間生死君雖無有有君之子隻雞斗酒來
此哭君靈者不死尚其我聞

雪坡集卷四十八

欽定四庫全書

雪坡集卷四十九

宋 姚勉 撰

墓銘

菊坪朝奉致政壙誌

嗚呼此先君子菊坪先生之墓也姓姚氏諱某字行簡
瑞州新昌人寓高安高大父曰特奏狀元進賢府君曾
大父曰釋褐狀元黃州府君大父曰汀州府君考曰學

正存齋先生妣曰周夫人生母曰楊太君辛亥五月十
有八日生寶祐癸丑十有一月十有五日後明年二月
十有七日葬于隆興府新建縣西山之雲峰男二人介
先卒女四人將窆勉泣血誌曰先君子生時鬻田而教
子損己以益人為善孳孳老而益篤勉既竊第書來曰
爾母貪好爵當損秩增貢以利無窮十月勉至自京師
僅一月而先君子沒矣欲養不俟哀哀蒼天百日卜葬
西山之巔嗚呼陵谷後或變遷仁人我哀尚封斯阡

石莊范學錄子堅壙銘

郡東七里新塘岡拱山環水吉且良郡之文師范石莊
大帶深衣此焉藏先生之文古辭章高視韓孟揚其芳
蛟龍蹄涔脫名場藥不龜手授客方弟子輩行爭頡頏
先生騎鯨返帝鄉甲子僅周人盡傷斯文有脉壽且長
於乎先生不謂亡

潘司戶宗權墓誌銘

嗚呼此吾同年進士潘君宗權之墓也始宗權偕某登

寶祐癸丑第在京師相好甚驩請某為書冰壑二大字
蓋其自號也宗權儀貌端碩清英照人真若一冰在萬
壑矚然無纖瑱埃某意其致遠器也不相聞者三年一
日其伯氏泳書來請為宗權銘墓則宗權死矣哀哉追
思相從期集時如隔日事臨分屬酒軒然意氣相許孰
謂斯今乃隔生死昔求書者室之扁今求書者壙之文
尚忍伸紙握筆邪第其伯氏書援退之哀歐陽詹哀辭
故事為同年請某萬不韓若宗權則於詹無遜不可使

不聞于後乃為位而哭哭已銘宗權諱謀世宜春人唐
之時有曰圖曰洵美者以文顯宗權曾祖某祖某父某
皆韜光弗耀宗權生而重厚寡言孝友天至執父母喪
一如禮哀毀骨立處兄弟宗族穆無間言救喪佐婚靡
間戚疏嗜書如飴好客如渴多與名卿賢大夫游如滄
州程先生息庵湯先生西澗葉先生皆見器重精通毛
氏詩學為文章泉湧瀾溢宜春退之所嘗蒞郡士至今
學韓之文而宗權尤邃一舉於鄉即擢第殿射貫鵠由

迪功轉升修職郎授鎮江府戶曹叅軍未之官驟得疾
終于正寢將屬續謂其兄葬已必求某之文以為銘某
豈足托以死者邪宗權生於戊寅夏四月壬子沒以甲
寅夏五月己卯僅三十有七娶南雄法曹叅軍孫公裕
之女有二子繩孫振孫皆幼嗚呼天豈不福善壽仁邪
而於宗權獨不可詰與之名不與之祿與之德不與之
年奮焉而蹈隨榮焉而悴繼經綸之志齋入冥漠豈受
氣大化得其清者以為德為名而不得其厚者以為福

為壽耶銘詔方來尚慰其志葬在縣南仁孝鄉聚龍院
原祖塋山之右其日丙辰二月壬申也銘曰

嗚呼宗權有文而賢宜福宜壽乃不假年萬里亨衢
一息可到擢第期年遽以歿告濟時有志曾不少施
子穉妻孀見聞為悲幸哉有兄克訓其子可箕可裘
雖死不死不負子托揚名于阡慰吾同年嗚呼宗權

周恕齋墓誌銘

濂溪周夫子曰師道立則善人多信哉言也古先盛時

以德行道藝取人於比閭族黨比閭族黨之長則皆耆
英碩彥為後進式然後德行道藝相師成風今之世為
前輩者率不能自重後生小子浮躁譁誕能為數語華
靡不根之文即自視以為孔孟不過如此由是德行道
藝之風愈微則鄉無前輩之過也苟有前輩為之師必
不爾恕齋周公則新吳之鄉先生也某聞其能淑艾後
進久矣先是新吳有華林書院名流多此焉出遺風寢
遠疇嗣厥音公與同邑王君立書院于登高山之麓萃

英秀而教之中設講堂四齋旁列扁曰道藝曰文行曰才德曰器識謂藝者必本於道文者必副以行才者必將以德器者必深於識也豈徒習訓詁工聲律哉余嘗得其序齒圖觀之從之游者幾數百成人者不可勝計信矣師道之不可不立也今典刑亡矣闕風俗不細哀哉公諱允成字子韶恕齋其號也世為豫章之新吳人曾祖某祖某父某母袁氏公豐頤廣額龐眉秀髯望而知其君子也天性孝友內外無間言雖待臧獲未嘗疾

聲怒色博學強記通貫經傳以至天文地理陰陽雜技
醫學卜筮之書與夫裨官小說靡不諳究采其言之有
合於道者皆編梓之手抄未嘗倦也邑人多師宗之考
德問業踵其門者相接皆稱鄉先生焉吾鄉松垣幸先
生不輕許可獨稱為友人凡仕于邑顯于時之士大夫
皆欽企尊慕以禮交際屈之以重學校與人交數十年
如一日利不苟就害不苟避推忱待物赴人之急如已
恬淡靖退不喜奔競少而能賦每一篇出士林爭先傳

誦膏沾馥丐輒效場屋而公獨不偶僅獲貢壁水之名
而公不之計寒臆冷几愉愉如也周平園有曰得鄉舉
易得鄉評難公其有餘於鄉評而不足於鄉舉者歟嘗
遇異人授以丹鉛龍虎之方曰服此可以返老還童其
祕之公曰白日升天奚益以其方燎為藥濟里之衰疾
者年將九十步履輕健視聽不衰將終自誌其墓遺誠
謂子孫吾平生聖經賢傳心體躬行自覺超踰釋老歸
盡之日謹勿信地獄之說而作佛事喪禮一從古制遂

以癸丑十有一月二十有八日終於正寢生於淳熙乙酉蓋年八十有九可謂卓然達理至老死不亂者矣娶劉氏孝慈和勤後公一年生先公九月卒夫婦皆享上壽白首同歸亦異事也子三人潢濂洵中子早世女二人適邑士張師儉鄒時英孫三人耜杞楫曾孫二人焱榮諺曰三世為儒收功詩書矧四世皆儒者乎是必有興者公所著書有註孝經一卷文集二卷理究一卷雜誌三卷甲寅十有二月壬申以治命與劉夫人合葬于

上塲先塋之側其孫柟來請銘銘鄉之老師宿儒某不敢辭銘曰

嗚呼恕齋者儒之賢立師道以就善人言合乎濂溪無鄉舉而有鄉評言合乎平園敢以二周先生之言而銘鄉先生周恕齋之阡

陳允中墓誌銘

寶祐元年癸丑秋九月高安壺春陳君卒越一月某歸自京君長子之子珪孫以書來言曰先大父不幸棄諸

孤家君暨二叔父斬焉衰經中不敢書使珪孫告于下
執事惟先大夫將沒時進諸孤而語之曰我死必合于
浮塘之葬銘必於姚子成一請之當不吾靳也諸孤奉
遺言弗敢墜謹使珪孫請子是行從政于吳遠將不暇
及幸早為我銘之某與君諸子遊知君為悉也宜銘某
觀洪範之次九疇以壽富康寧攸好德考終命為五福
求之世每不多見間見亦罔克脩某所知獨君能兼之
方淳祐丁未某聞君有泉石之勝造焉圃曰依綠一溪

繚其中瀦之為池環之為洲臨之為亭榭引之為流觴
曲水時春且半花木層出如錦綉領客觴詠幅巾杖屨
毫眉玄髮出入桃蹊竹隧間如世所繪老人星地行仙
者某亦甚羨之也君平生不殖貨而財自裕不豪奪而
產自豐十數年不一至城府丘園宴適延儒教子之外
無所事可謂壽富康寧矣靖惟其故則攸好德一念實
為之先是陳宜都王子孫家九江累世不異號義門其
後徙高安君之族其別也君諱大用字允中曾祖某祖

某父某皆世隱德君少孤事母兄以孝弟著性好學求師數百里外習詩通大義遂以儒倡其族至今文物彪炳家人人儒登賢能書者相繼壬子歲君仲子偕族孫凡三人同時領江西湖南北舉今年其孫又以通九經擢童子科君之教也君諸兄歿行於族為長率以禮訓以義患難疾病萃力相援扶母敢後者教育兄子某如己子迄有立嫻戚鄉黨或有爭不詣官府咸之君取決焉君曰某是曰某非皆悅服願釋爭以去武斷健訟見

君皆黯有媿色尤樂周急歲飢捐粟以賑提點刑獄使者翟公常平使者楊公常以其丁未壬子之糶簿上之朝乞旌其子以官而君不願也君又謂穀以養生藥以愈病皆活人事患藥市多偽甚病而速死感不忍乃即旁舍為藥室選良醫如古方製善藥以濟人而不牟利賴全活者甚衆可謂攸好德矣壽富且康寧宜也君自中年場屋不偶即棄弗事聚書聘師付功名於子若孫營壺春老焉有別業二曰鶴嶺曰廣城去家各數里皆

築室將俾孟仲二子處之今年九月九日君在鶴嶺泛菊觴越四日戊子得微疾謂家人曰我未嘗有疾今疾殆不可起遂召子孫訣而歿可謂考終命矣君娶王氏先二十年卒子三人長績貢為博士弟子次應炎即江西漕舉進士次紱亦進士業女五人長適胡日升次鄧震龍次晏燦次胡鼎來次李元龍皆為儒孫四人宜孫振孫珪孫雋孫珪孫則擢童子科者也孫女三人長適鄒淮次許鄧子彪未嫁次尚幼君平時為義方訓晚年

竟及見其子若孫之效驗以歿天之福善也後有興者
當未艾又範所謂子孫其逢吉者歟君以淳熙癸卯二
月乙亥生年七十有一諸孤將以明年甲寅十有一月
奉柩如浮塘合母王氏葬從治命也某亦感君將歿之
言不敢負所托焉即為之銘俾葬而刻諸石銘曰

嗚呼陳君派義門天資粹靜如玉溫五福兼備德所
根壺中之春自乾坤儒倡其族卑從尊椿老桂茂昌
蘭孫吁嗟德人不復存善積未報裕後昆不于其身

于子孫

運屬姚公伯武墓誌銘

姚之宗為瑞之新昌著姓者二家邑郭者出自濰州蓋
中散大夫恕之後也家靈源者出自豐城蓋弘文館學士
思廉之後也族雖異然得姓自有虞氏則一凡詢新昌
姚氏者咸以為一族而二氏子孫亦知柯分同根派別
共源等百世而上由耳孫而遡鼻祖不可以異視相與
講同姓之好甚密真若出一族者非若周秦之劉宋衛

之孔為磻為尚之石為宋為燕之樂其始既異其終卒不可合者也運屬公諱公烈字伯武其先濰州北海人中散在國初仕至上柱國傳至銅鋹縣令某者君之高伯祖也初以太學上舍生及進士第後以忠歿王事廬州教授某者銅鋹府君之弟君之高祖也曾大父某以伯父任得仕再轉而丞新昌因家焉自濰州而為新昌人蓋自此始大父某父某皆韜英含章不願仕進君生而穎悟弱不好弄既長溫而文簡而有禮母龔氏龍圖

端之孫君在祿中已失母十有二又失父事繼母柳夫人以孝聞克自力學師雕友琢寒暑靡懈揚侯大異晏君大烈皆所嘗與同几席者也習毛氏詩究三百五篇之旨為舉子名烜烜震場屋既命弗偶則翩然舍去以詩書燕娛其身心稼雲于田花組于園詩歌棊酒日與賓客樂之蓋不義名韁之繫宦轍之驚也家饒財累貲至鉅萬然不有其富輒分以惠貧歲每侵鄉大姓操為富不仁之心挾裁射利閉糴以翔粟直一唱百和無毫髮

惠利心色人于菜殮人于塗而不之顧蓋相望皆是公
獨不為此遇歟必盡發其廩減價糶以賑飢賴全活者
不可勝計童顛兒齒歡呼攜扶揭綵為幟誇誦盛德拜
其門以謝者日以百數荆溪吳侯某將漕江西邑令趙
侯某上其事於臺乞旌以勸荆溪嘉之召補寮屬日與
燕接訪一道利病時朝家方行和糴荆溪詢以數糴事
宜公力言非便宜聽民自與官為市荆溪是其說將請
于朝而官之會去弗果人為公惜公曰吾但欲為當世

賢者所知不計己之官不官也既歸為善益篤邑計闕
即預輸賦以助在官在民皆恃公為命脉喜教子延名
儒以為之師自講習外一不以事累治家肅而有恩下
孝上慈繼母卒追慕號痛有促織飛集几筵七日夜不
動人以為孝感邑令刻之碑紀其事繼母先適醴陵劉
氏有子公待之等同歲時餽問不絕睦宗族以和接婣
戚以禮處鄉黨以恭濟閭里以惠蓋一鄉善士也荆溪
使長沙公欲往則疾已革矣生於壬戌之三月歿於寶

祐癸丑之十有一月僅五十有二未歿前一日夢神人
召至一官府告之曰此公治所也既寤為家人言之翌
日而歿某嘗歎世降俗末仁義之道微貪饕之習熾知
欲而不知有理知已而不知有人近年以來有豐歲無
豐民年穀不登閉糴之害如前所云矣間稔民宜有自
養富多貲者平價糴而盡之無圭撮藏于野深扃固鑄
幸水旱以年其利民不問豐歉皆艱食舊時民以凶年
病今樂歲亦病矣造物者懲遺一二如君之人以甦吾

民亦可以少厲薄俗乃不畀之壽而早奪焉冥冥之中其無天耶然生則不官之明死則必神之幽又不可謂之無天矣世之嗜利無饜惟欲自肥者聞君之風其亦少勸乎公娶柳氏其母之兄子先一月卒四子應興德潤皆嘗貢成均有聲有俊亦皆通經能文孫之英之秀女孫一人皆幼易曰積善之家必有余慶天也其在斯乎君歿之明年甲寅諸孤將以十有二月葬公于邑之太和鄉金印阡先期來請銘曰吾宗也不可辭某遭閔

凶不能文且先君同以是歲月歿僅五日隅言及公歿之月又惕焉重先君之痛其何能銘然新昌二姚氏其子孫相好也久銘固非禮辭亦非義禮有可以義起斯銘也不得與他文辭比雖不文姑以不文之辭銘之曰伯武之賢邑人之天胡不壽旃以為民年施者益遐報者必厚金阡我我尚福厥後

李廷章墓銘

瑞新昌義鈞里李君諱廷章字煥卿紹熙庚戌十二月七

日生淳祐庚戌八月二十二日歿寶祐乙卯十有一月
庚申葬實在太和鄉之峰潭章洲其族兄萬安丞紀厥
素履友人郭君霆發以書先其孤來請銘某讀萬安之
編品之曰鄉善士某聞李君善名久且萬安暨郭君又
某平日之欽而信者也有言靡不實顧行述已備可信
後毋庸贅姑為銘銘曰

今人常言世遠三代疇知古淳往往猶在有人於此
行修于家鄉里稱善謂古非邪嗟嗟李君樸樸醇嫩

識不識者謹曰善士不入城府若龐德公化鄉無爭
彥方之風任恤睦嫻安分循理智傾力奪恥有諸已
昔者李愿樂隱于盤山美水鮮惟適之安今之李君
豈其苗裔生無怨嗔沒有嗟喟勿謂其歿不歿善名
千載之下人信此銘

拂雲居士塗君墓誌銘

新吳塗氏有數子從余游問其族某賢以子儀對戊申
道新吳亟訪之登拜既即以真率具觴余於所謂拂雲

閣者耆德粹重兄弟燕怡諸子森侍皆衣縫掖衣與客
論文說詩不知其處約也癸丑余歸自京君之子夢青
以書來言曰先君子不幸以微疾棄諸孤矣將以治命
葬于里之華塘惟先君平生喜教子矻矻靡倦擇名師
從之游南康有胡氏學得自考亭俾夢青兄弟往師之
雖鬻產以資費不計也夢青兄弟幸知聖賢書乃未能
奮身儒科以慰其志橫目俗民多以教子無益騰笑起
譏先君略不為動曰學問人也功名天也不可以天之

未應而急其在人者且學不在是愈不倦事親孝為兄
友處族義與鄉和年登八袞耳聰目明且歿遺言詔諸
子毋徇佛老今葬矣不有銘以傳後大懼不孝夢青不
能求之當世顯人願求之子幸哀我銘諸某素聞君賢
且及識雖一別五六年不再見歷歷猶在心目貧而能
好客鄉里稱善人猶可及惟一意教子俾從知道者游
且不以窮達易其志非有卓識疇能之此一事已可詔
後敢不銘君諱某子儀字也曾祖某祖某父某娶周氏

伉儷黃髮子五人山甫夢青一覺仁甫吉甫女二人長
適進士王清叔次適進士曾子雲孫男九人曾孫男九
人皆業儒四世儒家必有興者銘曰

稟秀為人尤秀為士位高金多不克儒子義方有訓
一念在茲圓冠環立以孝事慈家為儒門身享遐壽
泰無不足是即貴富有深其根厥實必蕃君雖不存
以子以孫

揭汝功母王夫人墓誌銘

寶祐元年秋八月辛酉望越五日甲子揭氏母王夫人卒將葬來請銘夫人中子成大字汝功者初館於余之婦翁鄒君家聞余而未識也翁適隣壻汝功密偕之相攸贊曰此正佳壻歸省其母母問遨遊豐瑞間識何士具以告母大喜語笑異常時余時已知其有陶士行王叔介母風也採之鄉譽益信夫人名如玉字季瓊在家時六七歲已閑女紅端靜如成人賢女也長適揭氏相其夫正伯躬井臼而逸之學俾從主一張先生遊有寇

亂保姑喪不去賢婦也正伯客遊四方十餘年三子齊
丘成大必端皆夫人自教夫歸男女已冠笄成立矣性
不羨侈富族親豪右宴召未嘗往夫歿力貧以畢婚嫁
治家有法鄉里有則賢母也生於淳熙戊申歿於寶祐
癸丑年六十有六葬于書家坡夫人聞其子之言知余
而賞之余曾不能升堂一拜盍銘其葬使後世知有夫
人名銘曰

書家之坡詩書家之母之藏也母訓家以書其後必

昌也

雪坡集卷四十九

欽定四庫全書

雪坡集卷五十

宋 姚勉 撰

墓誌銘

譚氏孺人墓誌銘

余與興國軍教授豫章程君澥第南省同年程君兩年
長以兄事之屢嘗跡其庭見其內外肅如僮奴指千皆
紀綱之僕賓客日滿門教授兄談麈坐對未嘗顧指揮

具酒殽而疊列俎陳水珍陸甘畢備樽既臥問有無必
復進余每異其主孟之在中饋者必賢也已而詢之果
然蓋謁于其族則族之人曰教授婦孺人也譚氏諱幼
玉豫章新建厚田人祖遵父畝皆以謹厚稱孺人在父
母家已有微譽父母疾嘗兩割股肉為糜愈之既歸于
程事重闡舅姑尤恪謹雞初鳴冠帔問起居三飯奉珍
鮮侍立食既乃敢去節春秋朔望行家人禮奉觴上壽
姑袁夫人歿哀毀過常繼姑今陳夫人尤愛其孝性勤

約不事侈靡蠶績事必躬執紝執鍼皆號為精絕能琴
碁尤喜閱書史誦袁氏世範甚習善相夫樂教子吾族
之賢婦人也詢于其鄉則鄉之人曰孺人禮賓客恩戚
婣樂賑乏絕歲有侵必勸其夫下價發廩以濟飢慮細
民少錢不能多糴則米其穀隨所糴多寡應之或不能
糴則給之食仰糴者日千百全活甚衆富而好禮積而
能散吾鄉之賢婦人也余既得所聞於其族與鄉意其
賢益信寶祐戊午十一月教授以書來為孺人求銘則

孺人以十月八日歿矣其族與鄉所稱及余所聞之賢婦者亡矣惜哉孺人以嘉定癸酉八月生以紹定庚寅歸程氏寶祐癸丑教授兄弟南省丙辰入對擢甲科子一律又以乙卯江西轉運司試貢今年十月姑陳夫人復受封孫逢吉亦秀爽顯貴方開正孺人享有榮祿之日也迺臥病九閱月而歿僅年四十有六歿之日去姑陳夫人受封時未兩旬浹蓋孺人以伏枕不能躬賀拜病遂增劇故其歿陳夫人尤痛悼之教授兄來求銘蓋

將以開慶元年四月丁酉葬孺人于茅岡之鑑垣余也
亦有悼亡之悲者也故於教授兄之悲不銘無以塞其
意矧素知其賢且同年兄行之婦如嫂敢辭銘銘曰
族稱孝鄉稱人溫且惠程之嬪事已之親以及夫之
親理家其有倫天胡不壽之範世之婦人夫兮亡舉
案之賓子兮不報斷機之諄石可泐悲不泯

萬安周貢士墓誌銘

萬安周君公弼亮甫以丙辰正月乙卯客卒於京之富

春有子夢星將以丁巳十一月庚申葬之金鼎山龜峰之原前期夢星以書告曰某素游先生之門願假寵以光其幽敢請銘維周氏在廬陵與平園益國公同系後徙萬安高祖獻擢元豐第終萬載令曾祖某祖某父某皆不仕君少篤學精虞夏商周書為文動數千言端平甲午與貢試禮部弗偶當路屢欲以武爵爵之君不可後峒寇作扞鄉井有功亦弗受官曰吾必取科第癸丑該恩試南省又弗利益力學至劬瘁且病乙卯冬小瘳

復治任東親友交勸勿往君曰譬之武事吾寧馬革裹
尸還葬耳竟旅死僅年五十有五吁亦壯矣僕常惜後
世科目老天下英傑雄氣銳志不肯自休者必死而後
已雖有才且能不得自見於世失人亦多矣君有田可
耕有圃可游有亭榭可嬉有歌舞可娛皆不自足必欲
取名第雖勇爵不願雖客死不悔可悲也雖然君平生
恤窮周急雖不得於人深得於天旅櫬歸舟歷鄱陽湖
春浪正高至是帖然濟無虞天猶福善也雖名第不如

志不在身在子孫夢星其念厥考求名之勤客死之哀期有成以慰君志銘曰

志於求名不家之死寧死于京哀哉子能有成尚慰

君平生

豐城鄒君墓誌銘

始某未第時家四壁立讀書聲與腹雷並作過之者弗睨也孰有以子妻之者乙巳冬十月忽晨有數客至出延之坐不知中一人乃鄒君也去數日媒以書來曰豐

城鄒君有息女不肯與凡子擇名士欲以為婿昔者微往見子則大喜以為毋論其文在相法亦當富貴決意婿子或有短之者曰姚雖儒貧也屋數間且破瓦不覆椽日與天日相覲風旁雨上何以處君女鄒君笑曰之人也雖無屋可婿况猶有椽乎求士詔近矣之人且舉且第鄒君之意如此子以為何如時先君子聞此言大賢之即許諾明年丙午某試鄉舉不中選丁未游太學復不遇人皆笑鄒君大誤君不之改戊申某始受室已

酉不幸先室人即世笑鄒君誤者哄矣君亦不之顧又五年癸丑某始以集英廷唱賜進士第一人第時鄒君則留次女未嫁俟某之成名而繼之婚某亦感君之知已也罔敢背德義遂繼好前笑者方止咸服君有知人見某方竊祿斗升亦願奉兩家翁宦遊四方樂也嗚呼豈料某不孝不天至自京僅一月先君子棄我不兩年婦翁又棄我乎大德不報哀哀靡忘不為之銘是沒其素君諱一龍字伯驤世為豫章豐城東湖人後徙鄒舍曾

祖某祖某父某皆有德而隱君和易謙厚質直謹信少
塵於學事親孝為兄友田疇室屋皆擇取下者而以華
腴讓其弟在鄉里雖田夫野老待之一以禮與物無忤
好善急義每損己濟人嫻黨間嘗有困於訟者君質田
拯援之後竟不償貸君亦不問也有橫逆必自反犯而
不校然剛腸嫉惡有忤於理道者未嘗與之坐視之如
仇雖請召弗往及儒士至則愛之如父母倒屣迎御挽
留繼日燕觴娛樂去則餽之贐他人之門可羅雀而君

門外日有長者車轍性不嗜酒惟喜醞旨以飲客歲所收僅足厨傳家無贏財人皆笑君不事產業務儲峙君則亦鄙其奴事錢粟也喜教子擇名師館之日夕偕寢食鏗然夜誦率至明發君坐其間聽之不翅彈絲斂竹之樂未嘗有欠伸態好儒嗜書蓋天性如此女不肯泛嫁子亦不肯輕娶以是歿之日二子皆未婚幼女亦未有適始娶陳氏早卒再娶李氏竹林先生之孫武岡宰恕已之女今提點淮東刑獄使者宗正丞義山之從女

兄也前君二十年卒某之婦及君長子則其出三娶周氏皆儒族君生於嘉泰甲子之七月辛巳歿以寶祐乙卯之十有一月甲午僅年五十有二初苦痔繼以喘知弗可療乃卻藥不御將屬續語不及私惟戒子讀書囑某與師以改葬其父及教子而已餘問者皆弗答麾家人使去曰吾不死婦人手沐顙已正枕衾逝于正寢聞者皆悼嘆於戲如君者當求之古人也今人蓋不多見犯姍笑擇寒士為子婿一不止又繼之雖不獲饗有其

報其事則可書矣天雖不假之壽歿而有稱即壽也況所積者遐其後必昌歟有子二成大可大女子子三妙善妙莊則婿某者也妙端在室歲丙辰君歿且期年矣宅兆未協卜某誤恩得召雖以祿養弗及不忍仕辭亦念君未葬不敢負所托改外太舅葬既有遠日十月庚申迺克相二孤奉襄事葬君于歸德鄉之粟田附先墓且樂丘也碣之阡以詔後銘曰

嗚呼鄒君室此區其生之年雅好儒教子以經志勤

渠擇婿一事最可書若此婿者世豈無識之未遇則罕如天嗇其年人所吁積善之慶必有餘山中我我墓之廬過賢者墓當下車

梅莊夫人墓誌銘

梅莊夫人鄒氏諱妙莊字美文豐城縣興仁鄉鄒舍里人高安雪坡姚某之婦也曾祖諱某祖諱某父春谷先生諱某字伯驤母李氏知武岡恕已之女邕管安撫脩已之猶子提點淮東刑獄使者義山之從女兒也某先

娶夫人姊諱妙善字美韶亦端惠淑順生紹定戊子十月辛丑朔日之申九歲失母克綜家事育弟妹至成人年二十有一歸于某某時甚窶無肯妻以子者外舅獨願女之家人更諫不聽卒許嫁竹堂既歸能安貧事某父極孝解其裝質以贍族親客至不戒而殺酒具靜重寡言通孝經論語孟子偕某夜讀書卒不寐達明某雖貧竹堂善經紀其家使至不乏而逸某以學族閭嫺戚甚宜之不幸近一年己酉之五月生女榮至六月辛丑

朔才二十日而歿次年榮亦殤某感外家知已不敢忘
義不忍他娶服既除求繼好外族譁然莫之從夫人蓋
亦怒其為是請者也獨外舅愛某以心卒不以夫人他
許間有請婚卒議不合越五年癸丑某對大廷天子親
賜以第一感念不忍負外舅復于大人再請盟外氏方
許諾夫人曰是不易交易妻者亦可之將以是冬娶會
十有一月先君棄諸孤不果丙辰二月乃克親迎夫人
賢猶竹堂而又明敏英悟動率禮法自以不逮養舅姑

四仲月恪恭祀事尊者甚禮撫卑者甚恩先室無子
歿後妾黃生子元夫告廟立而嫡之夫人歸愛元夫真
若姊之子與已之子縫組裘履不少懈自訓之書謂外
舅婿儒政為教子地延名師某家誨其二弟俾元夫就
學焉室不置私庖有盃酒必與妯娌同飲而使某外飲
兄弟賓客蓋未嘗夫婦自親瓶壘也義理相扶有過必
挾某間怒臧獲必警曰懲忿窒慾稍起私念必警曰克
己復禮朝夕多賴其益好善喜義輕財周急初歸時某

從妹及庶弟皆未婚夫人曰子且仕矣不可有未了婚
嫁汲汲擇姻聞梧州趙司理孤女賢聘為叔姒而以從
妹歸進士龔三德是年五月某得越幕七月誤恩蒙召
辭弗俞九月除某秘書省正字夫人曰毋急進姑了吾
事必婚嫁予弟妹葬遷其父祖十有一月末乃行婚喪
凡四而兩三月為之治辦整如略不見難色送迎資聘
大抵皆其衣珥無所惜也既偕某入京至中途三學上
書言事士皆以罪逐纍纍滿道參相久軒先生且去國

某駭所聞見憂得疾不欲往然恐傷夫人從任意進退
維谷未有攸處夫人曰人之出處如魚飲水冷暖自知
尚何疑乎臣受君恩有過則諫諫而不聽則去母以妾
故苟以直言得罪願同謫嶺海死不悔妾願為賢人妻
不願徒為貴人妻也某甚壯其言時方有輕去重竄之
戒某恐其時不得言越職言且得罪言而去罪必重夫
人娠月已深某不忍以遠竄累乃援老泉蘇公例辭召
上封事且與丞相以書買舟自信江徑歸夫人喜即日

屏金珠首飾遣人市鍛石簪插之某問其故笑答曰荆
釵布裙入山之服當爾某益欽嘆其勇丁巳正月歸至
家戒某杜門謝客一意讀書初出以家事托某從兄嫂
歸日一仍其舊率弟姒以聽雖羹藜飯糗一室如春閨
門方肅肅有度三月而夫人死矣先是某長兄死無子
族昭穆無宜當者尚未有以嗣夫人謂幸有娠女也自
育之男也以爲伯後元夫即吾之子矣嗚呼斯言也可
以感天地及吾祖宗也乃竟以此死三月望之前一日

臨蓐果生子但已死腹越七日丙午夫人遂亡病且亟
猶命工縫以衣元夫某至今命元夫無敢衣之笥藏以
識母德死之日猶戒某勿輕出再三誦猶吾大夫崔子
也一句不能曉其意問之不答嗚呼其有所為也夫夫
人為李氏甥李氏學自文公先生來且熟聞彭夫人相
後林先生家法度務則而行之日讀論語孟子數篇間
喜觀唐絕句詩尤愛誦文公先生武夷山十詠宛轉高
下其聲以歌之而不喜世所謂樂府姊妹皆能詩然皆

不肯作曰非女子事也竹堂存時見某教其幼弟屬五
言對以兩岸綠楊風命之竹堂以八磚紅藥日對意以
屬某也某大駭其能梅莊與某過信之月巖愛其奇領
姬御翩翩登之某在後望之如仙直至巖所命筆識歲
月題一絕云半壁行天柱倚空人間有此廣寒宮從今
真似天邊月曾得嫦娥到此中自擇風雨不及處題之
不因此題某亦莫知其能詩也其深靜皆如此厥後某
索其倡賡輒不可性喜山水既西舟曰雖棄官不可棄

山水登溪山堂飲而去某復以詩請曰此人迹所至之地安可留婦人姓名於是間卒不許噫夫人之志於此亦可觀也每過番陽湖聞自是可往廬山意欣然欲行某不可約以秋而夫人不復秋矣哀哉夫人以庚寅六月辛酉朔日之已生與竹堂夫人諱同日在某家是日元夫為壽感額弗許常自謂疑與姊一人而二其生故身死同日與竹堂貌本異歸日舉動言笑家人皆以為甚類竹堂且嫁某皆一年又皆以薨至大故是不可曉

也嗚呼外舅以夫人姊妹婿某某未能以毫髮報但以謀嗣續故累其二女皆早歿彼蒼者天何辜如斯福善壽仁理復安在外舅擇婿於貧且賤使其女得同其爵位富貴而居有之亦足少為好儒者之勸今其報乃如此為善者其懼矣雖然人有生而如死亦有死而如生某生天地間雖止兩年有婦二婦雖皆一年而歿然而一年之中百年義在某誓不負外舅知且有子元夫娶決不再矣俾元夫盡子職以報劬勞某也益自植立復

植立其二弟使鄒之門戶終顯有光外舅與二婦雖死
不死過於生時是即善之終福仁之終壽也亦可以厲
薄俗矣使某比之匪人苟不義富貴為世所罵笑以此
易彼不惟外舅不欲二婦亦不欲也願賢而不願貴梅
莊此語其某也終身之藥石乎銘吾之心且以銘墓墓
與竹堂夫人同域葬以戊午三月壬申銘曰

夫婦天理無古無今人孰不死不死者心姊賢早亡
妹繼亦逝天欲觀予終始斯義不尚夫貴願貴而賢

斯言有味青史可傳揭銘于阡以詔萬古永言保之
里二賢女

葛母墓誌銘

嗚呼甚矣葛母之為賢也飭閨門勤絲枲睦族黨禮嫻
戚慈臧獲謹婦德相夫起家賢已未盡見其為賢也獨
一事為難能生為人所稱歿不可以沒其實夫孝子亦
多矣而孝於非生已之母者始足見其為孝慈母亦多
矣而慈于非已生之子者始足見其為慈葛母賢已母

某氏嫁于進士葛某有二子豐也以姊之子入繼謙也側室生也而母待二子如一慈愛之皆真若已出二子事母亦雍雍盡孝無間言母歿某往弔之二子執喪毀瘠泣出血盡哀觀其子之孝信其母之慈也葛母賢已二子請銘是宜銘母以某年某月生以某年某月歿十有一月乙酉葬于某里曾祖某祖某父某儒者流也二子皆有子今孫六人銘曰

葛賢母葬于此姚子銘之噫世之為母者法之

鄧仲翔墓誌銘

昔石莊范先生嘗為某言鄧君仲翔之賢也心已願識之歲嘉熙丁酉秋鄉試揭姓名于郡城樓鄉貢額僅八人鄧氏乃都其二一則仲翔也當時一門盛事歆艷井里願識之意愈深矣既乃獲詣其家俊秀之林而拜焉信矣石莊先生之不誣也仲翔為人意氣軒然謙恭下士樂施好客博學強記歷代諸史爛然蟠其胷襟醜酒對客縱飲劇談古今治亂成敗之原君子小人正邪之

辨舉數十行不遺一字千數百年如在目前音節清亮
首末該貫聽者忘倦性尤友愛與其弟某樵倡蕘和未
嘗有違言忤色闔門千指雍如晏如雖家有餘貲若不
自知其富其視世之粟奴錢虜吝驕鄙俗之氣浮於顏
面者相去不啻穹壤千萬接物和處事得與人信下至
田夫野老嬰兒孺女皆得其驩心蓋嘗評其為人雅好
賓客似陳孟公議論精博似習鑿齒兄弟友愛似姜伯
淮處鄉公正似王彥方合古數人為一人今人未易多

得也仲翔自丁酉登薦書明年試禮部不利寶祐丙辰
且該恩再試方築室讀書益自磨勵而先二歲仲翔歿
矣齋志飲恨聞者為之惜嗚呼鄉舉可能也鄉評不可
能也仲翔雖不及取高科入仕以行其欲為之志然而
生為人所稱歿為人所惜是不歿矣仲翔諱某號南齋
其先建昌人九世祖某始家高安曾祖某祖某父某皆
隱不仕仲翔生於丙辰之三月歿以甲寅之十月僅年
五十有九先娶陳氏生子士達繼趙繼徐皆前卒又繼

袁皆宦族孫男二孫女三丙辰十有一月壬寅卜葬于
吳塘東山之陰使來請銘為之銘曰

嗚呼噫嘻仲翔已矣辨博之論不可聞已一封之土
藏其胸中千數百年之史若人而不仕若人而遽死
既不在其身尚福其子孫孫子

雪坡集卷五十